

重九登高六絕句

翟志成

蟲魚事業鬢衰殘，拋卻尋芳到遠山。半卷陶詩花下讀，
偏疑身在武陵灘。

蝸角相爭一局棋，殺機洗盡悟禪機。白雲草樹空山裏，
竹席蒲團坐阿誰。

勝心掃卻道心明，唯有文瀾總未平。險韻詩成三步後，
又將新句鬥旗亭。

始信前生未了因，偶然抱璞便歸真。雲中手扣松千樹，
盡是龍鱗百劫身。

彩筆何曾起國魂，吳鉤典酒換秋熏。夕陽染盡無窮血，
付與漁樵唱到今。

瑤臺刈罷紫芝田，眼底浮雲任化遷。最愛寒齋風味永，
黃雞白酒過年年。